

Thomas Jones, 1810–49

Cenhadwr cyntaf y Methodistiaid Calfinaidd yn India

Yr oedd Thomas Jones yn gwbl allweddol ym mhenderfyniad y Methodistiaid Calfinaidd yng Nghymru i sefydlu eu cenhadaeth dramor eu hunain ym 1840. Ganwyd ef ar 24 Ionawr 1810, yn fab i Edward a Mary Jones, Tan-y-ffridd, Llangynyw, a gweithiodd fel saer troliau ac yna fel melinydd ym melin Llifior, Aberriw. Dechreuodd bregethu tua 1835 ac ef oedd un o fyfyrwyr cyntaf Coleg y Bala ym 1837. Rhoddodd ei fryd ar fod yn genhadwr yn India ac fe drafodwyd ei gais yng Nghymdeithasfa'r Bala 1839. Penderfynwyd ei fod yn ymgeisydd cymwys a gofynnwyd i'r Parchedigion Lewis Edwards a David Charles gyflwyno'i enw i Gymdeithas Genhadol Llundain. Gwahoddwyd ef i ymddangos gerbron panel y gymdeithas er mwyn tafoli ei addasrwydd.

Derbyniwyd ef i'r gwaith ond penderfynwyd ar sail cyngor meddygol ei anfon i Affrica yn hytrach nag India. Nid oedd Thomas Jones yn fodlon ar hyn ac apeliodd am gael ei anfon i India, ond gwrthodwyd ei apêl a dywedwyd wrtho yn ddiflewyn-ar-dafod pe na bai'n mynd i Affrica ni fyddent yn ei anfon i unrhyw le. Fe'i hordeiniwyd i'r gwaith ar 1 Ionawr 1840 yng Nghyfarfod Misol Sir Feirionnydd yn y Bala, ond yr oedd yn parhau i deimlo'n anfoddog ynglŷn â mynd i Affrica, felly cafodd gyngor a llythyrau meddyg gan Dr Serph, y Trallwng, a Dr Carson, Lerpwl, yn dweud nad oedd rheswm meddygol dros ei atal rhag mynd i India. Cyflwynodd y dystiolaeth i'r Parchedigion J. Arundel a J. Tidman, ysgrifenyddion Cymdeithas Genhadol Llundain a'r pwyllgor llywio. Ond nid oedd dim yn tycio a chytunwyd bod cysylltiad Thomas Jones â'r gymdeithas i gael ei derfynu.

Creodd hyn gynnwrf yn rhengoedd arweinyddion y Methodistiaid Calfinaidd ac aethant ati yn ddiymdroi i sefydlu eu cymdeithas genhadol eu hunain. Galwyd cyfarfod brys yn festri capel Rose Place, Lerpwl, ar 31 Ionawr 1840 o dan gadeiryddiaeth y Parch. Henry Rees a phenderfynwyd yn y fan a'r lle eu bod yn

yngorffori yn Gymdeithas Genhadol Dramor. Cenhadwr cyntaf y corff newydd hwn oedd Thomas Jones, a chynhaliwyd ei gyfarfod ymadawol yng nghapel Rose Place, Lerpwl, ym mis Tachwedd cyn hwylio ar y *Jamaica* ar y 25ain. Cyraeddasant Calcutta ar 23 Ebrill 1841 ar ôl mordaith o bum mis. Trannoeth y glanio rhoddodd ei wraig enedigaeth ond bu farw'r baban yr un diwrnod. Dyddiau caled oedd y rhai cyntaf hynny i Thomas Jones, yn bennaf oherwydd gwendid ei briod, a'r glawogydd trymion.

Penderfynodd Thomas Jones ymsefydlu ym mhentref Cherrapoonjee lle'r oedd gorsaf filwrol y llywodraeth, ac ymroddodd i ddysgu'r iaith frodorol Khasi trwy gymorth dau o'r brodorion oedd â rhyw grap ar y Saesneg. Wedi wyth mis gallai gyfathrebu'n gymharol rwydd yn yr iaith a thyrrai'r bobl i weld y dyn gwyn oedd wedi dysgu eu hiaith mor rhugl. Ymddengys mai ef oedd y cyntaf i roi'r Khasi ar glawr a chyhoeddodd werslyfrau a gynhwysai'r wyddor a chyfieithiadau o *Rhodd Mam* ac Efengyl Mathew. Adeiladwyd ysgolion ym mhentrefi Mawsmi, Mawmluh a Cherra a noddwyd gan yr eglwysi yng Nghymru. Bu farw priod Thomas Jones ym 1845, ac ailbriododd, ond nid oedd yn gallu cyddynnu â'r cenhadon eraill. Ymddengys i'w sêl genhadol bylu gan iddo adael y gwaith yn ddirybudd a dechrau ffermio yn Pomreng. Ymhen tipyn bu rhaid iddo ffoi oddi yno i Galcutta oherwydd iddo gael ei gyhuddo o dwyllo a gorthrymu brodorion. Yno bu farw ar 16 Medi 1849, a chladdwyd ef yn y fynwent Albanaid.